



Svein Ottar Rørheim med resultatet av den første jaktatta. (Foto: Ola Matti Mathisen)

**I natt starta hjortejakta og klokka fem smalt det frå den mobile jakthytta til Svein Ottar Rørheim som var plassert på Myklebust. Jegaren hadde lege der om natta.**

Resultatet vart ein halvtanna år gamal bukk (pikhydning), ei tre-fire år gamal kolle og ein kalv, men Svein Ottar kunne lett ha skote fire dyr til som var i nærleiken. Veret var ideelt ved jaktstarten og han reknar med at også andre har skote hjort i natt. Det er gjeve løyve til felling av 131 dyr i Uskedalen.

- Eg starta jakta på bakkane til Olav Hjetland Bringedal fordi han har eit sterkt ønskje om å få redusert hjorteflokken som har plaga han svært i det siste. Faktisk har han hatt så mange som 20 hjortar på bøen, fortel Svein Ottar, som er ein av dei mest røynde hjortejegarane i Uskedalen. Han har skote godt over 200 hjortar, men mista rekninga då han passerte dette talet.

- Dessutan er det ikke noko mål i seg sjølv å skyta så mange hjortar som mogeleg, seier jegeren før han tek til med slaktinga.

I kveld er han på plass att på Myklebust og det er framleis nok å ta av, for Kjærland, Myklebust og Ytre Rød jaktvald har rett på 25 dyr denne hausten. Jakthytta har Svein Ottar konstruert sjølv. Ho er lett å bringa med på traktoren.

-Når vi har så mange skadedyr i området vårt må det vera ei prioritert oppgåve å få dei vekk for å redusere skadane. Og då er det mest praktisk å ta dei på bakkane der dei har gått og beita heile sommaren, seier Svein Ottar. Han oppmodar også andre til å satsa på denne jaktstrategien. Seinare skal også han jakta høgare over havet...

Til Kvinnheringen i går sa han at han er fødd og oppvaksen med hjort og var lei av hjortekjøtt før han flytta til Kvinnherad,

- Difor lagar me pølse av storparten og den er god, sa Svein Ottar.

Av Ola Matti Mathisen